

閩媛典第二十九卷

閩淑部藝文二

陳州苑丘縣令高府君夫人河南宇文氏墓誌銘

唐陳子昂

夫人諱某河南郡人也昔吾君夏后氏之子霸有幽都皇運北興鼎國南起開寶符而帝天下撫寧
璣而主中國則後周之受命武帝之雲孫夫人四代祖也曾祖某失周子之封亡山陽之國雖在天
子之裔已是咸陽布衣植德早天祖某隋朝官資至澧州澧陽縣令父某龍州司法皆承家席寵世
有令名夫人賁穠華襲繁祉崇徽蕙穆秀色荇榮自於幼年有令儀也十四適於高府君夫其溫慈
惠和忠信肅穆行有法度動有禮經嚴恪以理家人閒瑟以和君子則以含乎光大矣若乃宗廟哀
敬仁孝也娣姒祇和謙順也蠲潔酒食婦儀也黼黻元黃女工也弘此四德而務六親肇悅以文之
雜佩以發之猗可以作範母儀昭宣壺則矣至於訓子以睦教女以順愛下以慈與人以讓外以贊
府君之德內以光中饋之政皆日聞其進不見其退也嗚呼仁而不壽生而永終永淳元年某月遇
疾終於苑丘縣之官舍時年二十七嗚呼哀哉高府君尋以公事罷職山塋未卜旌旒來歸府君思

北海之魂留東園而殯日月遂往九歲於茲府君乃崇樹先塋增封舊域以大周天授三年太歲辛卯二月癸卯啟殯於東園遷祔於洛州某原禮也哀哉夫人雅有高行終而不忘以爲厚葬非禮也是以珠玉不飾塋瓦是藏高府君聿遵其志率以薄葬於戲非古之明德淑女金玉其光孰可以躋之吾忝門閭之賓觀其家道矣雍穆懿鑠實有清風故敘之而未充德也銘曰

天天桃李有花兮灼灼淑人宜家兮修睦婦道不譁兮窈窕嬪儀孔嘉兮何榮采之方茂兮而云落兮吁嗟

祭外姑宇文夫人文

前人

維年日月朔女夫陳子昂謹以清酌嘉蔬之奠奉祭於故高氏河南宇文夫人之靈恭聞夫人有清穆之德皓潔之行淳懿肅恭內外仰則而道風素範蕙敷蘭滋用能惠心光浮氛氲梁沚崇巖壺訓芬郁母儀中饋柔嘉娣姒有則豈圖慈顏幽翳於今十年墓木已拱尊靈廓然今吉辰叶應幽殯方開容象如在器質已灰改卜有典宅兆方遷山園旣列祖載行焉哀子號咷女也蟬媛於天永訣泣血流連子昂謬承嘉惠預叨姻戚生事早睽送終空積竊聞精意以享黍稷非馨敢陳薄醑以獻明

靈伏惟夫人明神尙饗

主簿博陵崔訥妻劉氏墓誌銘

張說

夫人劉氏其先彭城人也隋毗陵郡通守字子將之曾孫唐滁州刺史德祖之孫汾陽刺史延嗣之女子昔武子處秦厥初命氏元王國楚是焉昌族盛德之門龍驤接彩世祿之冑龜虎聯華夫人璇室載蘭蕙林層秀喈喈黃鳥豔豔清月明詩說禮竊比諸生茂行淵心實稱士母及鳳飛啟繇夫婦盡琴瑟之和鷄鳴咸繼舅姑移橋梓之敬友愛洽乎姒媚任恤周乎姻戚豈惟禮備澄霽工深機杼固已能循法度宜其室家矣年若干以大定元年七月某日寢疾而卒粵二十九日某辰假葬於某里夫國喪賢嬪家亡淑媛母氏垂白殞奪所懷稚子始孩剪焉無恃嗚呼天道輔仁人道與順眷茲七德不遐三壽何哉報應之理豈神食所言修短之期將事歸於命外姻畢萃累歎不足夫人卽吾姨也今薄譔素履永刊幽石圖史之外有美存焉其銘曰

崔實齊胄劉亦漢宗崇其顯構望乃偶雙闔闔是穆饋莫斯恭貞歌浮漢孝室洞江珪璋其節桃李其容宜享偕老胡寧鞠凶朝槿飛陌春蘿墜松夫傷子慕去此何從百歲之後魂兮合封

滎陽夫人鄭氏墓誌銘

前人

夫人諱某字某滎陽開封鄭氏之女也有唐銀青光祿大夫行少詹事博陵侯崔氏之妻中大夫中書舍人湜之母也高祖述祖北齊吏部尚書太子太保滎陽平簡公曾祖武叔北齊洛州刺史中牟公祖道援隋宋城令父世基故吉陽令故左僕射安吉公杜淹太夫人之外王父也夫人家世德門母氏鼎胄衣冠禮樂耳目所徵號之諸生實爲女士先夫人以崔出泰岳之裔鄭祖周王之穆長源修麓比濬聯宗故夫人年十有七歸於我氏盡敬愛以安舅姑致友穆以諧娣姒性寬恕尙素雅文而不奢約而不陋故邑號光啟象服是宜博陵侯更事兩朝多歷官序居必大理去有遺愛雖毳衣善聽得非鷄鳴之弼乎舍人及三弟長安尉泌藍田尉液左千牛滌咸有當代之名立無過之地滋液德教琢磨禮範雖趨庭善稟得非閨門之誨乎夫樂得好迷關雎義也鞠成衆子鳴鳩仁也采蘋采藻修禮度也如山如河有德容也婦禮旣成內則用貞母儀乃行家道以寧於是春秋高矣雅好眞諦屢敦禪味減撤珍華被服慈衣捐斥文綉總斯羣懿式是六姻故以嗣徽先姑垂裕來史詩所謂邦之媛也夫人有焉皇天難忱不享偕老年六十四神龍元年十一月九日薨疾終于洛陽之遵

化里其明年二月某日葬於富平縣之某原君侯傷神諸子銜恤寘銘幽窆用存終古其詞曰
東惟詹府西望綸闈吾夫鸚鵡吾子鵷飛青綬赤莩魚軒翟衣橋梓濯墓堂堂榮輝如何不淑奄永
泉扉漠漠元夜容容白日百歲之後同乎此室

右豹韜衛大將軍贈益州大都督汝陽公獨孤公燕郡夫人李氏墓誌銘

前人

夫人諱某字某故代州東治府右男毅都尉幽州高士李感之女也本姓張居於清河郡大父元愍
官至安東大都護長史與太宗有故賜姓李氏歷仕煇州司馬始家薊城是則帝寵舊臣乃命王族
官乎朔野因爲郡人偉哉孝友清白之仁基金鉤石印之靈慶必將光大別族繁衍淑女彩黛粉敷
焜耀華矚若斯之盛也夫人幼而韶異長而婉穆金聲玉澤薜蘿蘭茂傳賢莊姜詩美仲氏無以尙
也初汝陽公夫人元氏生一男四女而卒繼室以夫人封諸燕郡王元生立及長孫楊氏二女秉螽
斯宜爾之德著鴈鳩均養之仁色無偏和心無殊厚閨庭之內離離如也雖邑中五服之家門下三
年之客莫能察其異焉永寧里先人之舊廬也有通渠轉池巨石嶽嶮噴險淙澗潭沈沈殊聲異
狀爲形勝遊衍之處者十四五前夫人之孫蘇氏之婦弱歲孀而墮焉舉家環流憚莫能救夫人投

身赴水或沈或浮久之提挈僅免其行已也實多類此府君更郎將中郎將各一將軍大軍將凡四前後領左右羽林二軍禁營青海鴨綠二道總管天子元老白首兵欄腹心爪牙朝無與二外受珣戈文馬之賞內委金璣寶貝之飾將軍旣頒於部曲夫人亦散於宗姻可謂貴而好禮富而能惠者已及君子晨歌夫人晝哭喪有過戚制無越禮其後法吏苛禮宗子遠遷窮荒一訣倚闥三歲炎山瘴海曷云其來施珍玩以奉佛徹滋味以奉道精意入冥明神與直中興昌曆無廢舊勳先公茂乎飭終愛子榮乎起滯天步方泰家屯適夷宜享南山之壽頓奄西泉之駕神龍元年十二月二十二日寢疾終於洛陽之德懋里春秋若干國墜邦媛宗傾母儀孤嗣孝孫哀哀纓棘有詔旨曰獨孤某妻亡還京日宜給靈輿并遞悼舊褒德矜孤恤喪朝之大經者粵以明年十一月二十日卜葬於雍州之某原不從先塋古之道也夫計功伐勒鼎彝非婦人之事撰德行存國史亦孝子之志乃爲之銘曰

猗嗟昌兮月出之光如葉莫莫如華皇皇宜啟燕郡作合汝陽尊之象服錦衣襲裳以慈行訓曰仁之綱以命易難曰義之方婦有柔德亦惟其常女之士行於何是臧彼天蒼蒼胡降百殃捨我媚子

捐其高堂丘隴芒芒風生白楊象物皆盡德音不忘

上邽縣君李氏墓誌

前人

夫人太祖景皇帝之元孫西平郡王普定之女也賦靈陰德資性柔嘉事舅姑盡其敬與娣姒致其睦茂行充乎內則懿聲溢於外姻雖王家長自傳保而能謙光庶類降心細物手成朝祭之服躬採酒食之品凡婦人之所能事而夫人莫不備焉府君朱紱之歲也於是乎始受封邑象服盈門魚軒在路姬氏王者之後夫人帝室之親夫貴婦榮於此爲盛及帷堂而哭有敬姜之禮擇鄰而處有孟母之教入閭俟信有諸婦之期出言成章有衆女之誠受命不淑以某年月日卒於同州之私第以神龍元年十一月二十日合葬於萬年縣白鹿之舊塋有子孫殿中侍御史檢身承家揚名爲孝思我母氏感秦伯之詩祈於府君取周公之禮髮髯心迹志之幽石其銘曰

茫茫萬姓朝宗於李婺星分極咸池派水后稷裔孫神貽女士動遵法度居觀圖史輔佐哲夫訓成賢子宜崇徽號以享介祉高堂奄空霜露方始儉用禮節葬非奢美鏡下窆臺衣緘泉笥壟烟不散松風長起摘果人迷侵林獸死永言惟孝事親終矣

李氏張夫人墓誌

前人

臨淄李伯魚妻者范陽張氏女諱德性孝弟柔婉能日誦數千言習禮明詩達音妙續德言容工蓋出人也伯魚天下士善爲文擢校書郎出爲青州司功而卒夫人寡居無子以歸宗焉長安二年年四十有八傾逝於康俗里殯於永通門外景龍三年家疚居貧李弟說鬻詞取給冬十月安厝伯姊於萬安山陽蒼梧不從古之制也北望先隴西接抃丘明靈其嘉永安此室銜哀敘誌嗚呼孔懷銘曰

送送伯姊萬安之墳精靈何處爲雨爲雲彼臨淄兮千里望倏忽兮夫君

延州豆盧使君萬泉縣主薛氏碑

前人

或稱達性命者齊生死之域違憂怖者一修短之數斯蓋無心之倫耳焉足與議於精哉何則雲虹滅彩辭人於是詠謠華秀從風君子爲之歎息豈不以對仙麗之景懷變化而遺戀在昭蔡之節悼零落而偏憤吾見豆盧氏之子於其伉儷有焉縣主諱宇姓薛氏河東汾陰人大父駙馬都尉奉宸將軍諱謹尙城陽公主考駙馬都尉散騎常侍諱紹尙鎮國太平公主其在昔也夏有車正先封周

有薛侯爭長其在今也五宗姻於帝室重葉母於王姬河水經天上積星辰之氣霍山鎮地下多珠
玉之林縣主幼而敏慧長而洵淑貞孝義烈之傳吉凶賓祭之儀一聞成誦絃綖糾組之制潛毛醢
羞之品一見懸解至乃鶴迴清泛蠶聚崩雲月韻玖砧花濃珠樹婦人能事咸臻妙焉大聖天后鍊
石補天有王母之神器分茅列地啟弄孫之美邑封由有禮義引而親天授三年四月內封萬泉縣
主天愛下流日新上簡乘龍之舉和鳳爲難絡八紘以選門奄千官而求俊夫以龍圖帝寶祈步搖
之華源虎戟侯門襲燕京之雄胄人之信美帝用嘉焉以萬歲登封元年仲春旣望歸於豆盧氏六
宮送行百寮供事迺以轡輅遺以翟車環珮冕旒璆然在馭黼藻朱黛爛其盈門詔昏之禮於斯爲
盛爾乃移其愛敬以事舅姑伸其友恭以諧公妹舉宗洽比如鼓琴瑟每至婚姻會同少長咸集珩
璜節步金翠耀首有婉孌之心無驕矜之色晞盼眇者若遲日之泛漣漪瞻詞氣者猶光風之轉蘅
薄加以引納懷和饋分周賑疎屬自附窮歸忘窘故蘭行彰信於閨門而蕙風滿盈於邦國諒惟琬
琰之性自美抑亦劬勞之訓致焉中宗孝和皇帝雲迴南土龍見東京二儀更闢九族還敘望我兄
兮公主贊陶鈞之力曰吾甥也縣主開井邑之賦神龍元年春加實封三百戶縣主旣通濟門闌奉

御又尙司殿省天子巡遊宮觀觴樂池臺我有周親無時不從主家外幸比齊后而聯恩子壻中叅與趙王而均禮或醉飽踰度寒燠未平何嘗不御藥在門王人接路當時厚澤莫之尙也景龍四年二月以奉御出爲丹延二州刺史保傅下堂隨朱輪而同去輜輶入郡與阜蓋而齊飛辭宮闕兮歲闌戀庭闈兮日遠肥泉永歎邪氣攻衷楚祝招而不來秦醫來而不及景雲元年八月二十一日傾逝於延州之靡舍春秋二十有四美玉褫顏明珠晦色平陽舊宇遂無望於歸靈懷縣新文空流連於永逝有子三人西華南容東里等或齷或岐呱呱而泣天何以罰神其忍之冬十有二月五日歸葬於長安之洪瀆原窀穸營護有命加等器服祖遺率由舊章生之也榮葬之也禮若夫柔加好治善之元也肅雍降貴謙之道也山河其德容潤廣也熊羆其祥祚裔大也總衆美於修嫿落驕暉於小年此所以哀中之又哀也昔袁亡馬氏蔡筆斯奮鄭喪曹姬潘文亦作矧茲內範事華無愧砥望夫之石以表靈丘緝幼婦之辭將傳終古銘曰

薛之皇祖宵軒國禹相陰侯周氏其土字英英白雲鬱彼河汾公門蕃衍銘鼎氛氲則仁則義則戚則勳餘慶介祉誕靈女士中宗之甥鎮國之子皎若霜雪華如桃李舜族爰敘堯封咸秩萬泉開賦

三百其室守盛以儉居滿不溢亦既鳴鴈宜爾家人謙恭下下撫納親親傾財致客對饁如賓我有
邸第前臨黃道我有池塘却望青草漢輦停暮秦簫拂早歲月易忘歡娛難保良人出守將命北徂
與子偕往飲別東都望母腸絕辭家淚枯露萎莖草霜酸衆雛魂兮何歸京師之野葬於何處杜陵
之下巖巖雙闕列列行櫬勒是徽音永觀來者

潁川郡太夫人陳氏神道碑

前人

潁川郡太夫人者諱某字某雷州大首領陳元之女羅州大首領楊曆之妻驃騎大將軍兼左驍騎
大將軍號國公思勛之母也陳氏家富甲兵世莫嶠外夫人誕靈豪右淑問幽閒六行天至不因師
氏之學四德生知無待公宮之教原夫陳本嬌水楊承赤泉九貞爲郡良吏出守中國五馬浮江僑
人占守南海兩州接縣二門齊望十妻鳴鳳擇對乘龍楊翁有聘玉之祥應姬獲探金之慶號公弱
冠昇仕鞠躬禁闥正性本乎胎教剛腸形乎義色神龍三年七月五日北軍作難西華失守騎入宮
壺兵纏御樓公孤劍凌鋒羣凶奪氣倉卒之際安危是屬既立殊常之勳遂蒙超次之命受銀青光
祿大夫上柱國弘農縣公行內常侍其後改拜將軍太夫人是加爵邑堂高九仞祿重萬鍾朝廷美

其揚名州黨尊其遠聽夫人富而好儉貴而能勤身却錦繡手親紡績公每昏定晨省夫人必誠之忠孝勸學文武常謂汝口稱思勛當心念其義父母名之欲汝三思而勛勵也故號公便習干戈漁獵書史致命伐罪擒叛獠於百越寫誠誓衆破狂蠻於五溪鬪子弟如使手足請風雷若應期契聖朝答高秩於驃騎酬大封於號略豈非以辭第之懇忠誠斷織之明訓臣節立矣君恩厚矣子孝成矣母慈著矣備此四者善孰加焉抑神道祐心而人倫興行詩曰母氏聖善又曰宜爾子孫斯實穎川太君之有也享年若干開元九年四月八日薨於長安之翊善里先公早世丘墳故域古無合葬有禮從宜夫以體歸下地萬里豈殊乎黃壤魂何不之雙棺幸同乎元宅以其年十一月十六日招魂祔葬於萬年縣龍首鄉神鹿里申孝子不忍隔親之情也恩敕賜錢十萬絹布皆百段日磾忠厚漢武知其母教馮勤寵貴世祖稱其母德克軫天情頗爲連類號公生盡其禮沒盡其哀嗟閩水之日逝懼藏山之夜徙追鑲碑版遠貼圖傳烝烝至意有足感人愴愴信言故無愧色銘曰

陳公舜後楊侯周裔去國何人南遷幾世鄴淶嶂表朱岸海際兩族相高材雄兵銳猗歟邦媛儷茲國士友善琴瑟華如桃李心契法度容和愠喜資敬從夫移忠訓子嘉此令子南溟北歸於天鶴唳

拔湔鴻飛朱宮退散銅柱來威國家安寵魚軒翟衣子封號略五公前字母邑潁川三君舊土感激榮慶躊躇今古高堂夜空弔客朝聚龍首山前前臨潏川招魂五嶺合葬三泉山山丘墓樹樹風烟孝碑不滅茲墳永傳

鄭國夫人神道碑

前人

鄭國夫人者弘農楊氏之女開元神武皇帝惠妃之母也曾祖諱謀以禮樂習文爲越州司馬祖衍以折衝學武爲游擊將軍父宏以門才入仕爲雍縣丞而早卒初則天之代夫人言歸武氏曰恆安郡王生惠妃及家令忠太子僕信開元十年三月終於通化里其四月卜宅於少陵原哀子銜血號旻仰訴怨報德之不待託思齊以永慕皇帝挹鑾殿之內憂悵鶴池之外慘揚淑聲而金石刻揭高行而天地感國史司文命爲鄭志若清明下濟嶽瀆上升祥惠德門慶育邦媛神授孝德之性天啟聰達之心加以潤澤詩書游玩圖傳伯宗好直預誠將亡重耳羈遊先稱必霸豈知漢廷章奏假借仲長之才周官禮儀資稟宣文之學昌言嘉論有如此者螭首螭領修眉橫波旣工嘖嘆易爲容止肅恭而不踣舒和而不倨商周革命遇屯有怡懌之顏桑霍傲如在貴無驕矜之色端容一貌有如

此者紘縵祭服翬翟朝衣纂組入神剪制驚國雕胡之飯露葵之羹五齊六清三醢七醢皆一見而洞理或不習而知和女主中饋有如此者惠妃載誕皇子在者四人驪泉多龍丹穴多鳳克岐克嶷預見元凱之才實覃實訏早聞宵燭之艷亦關陰德之潛襲胎教之密傳乎又名子以義成家以禮忠者以令德爲忠信者以不欺爲信傳云去食存信信而有徵經云移孝爲忠孝則不匱周宗咸服紀季獨存至德深圖有如此者辟司徒之妻邑其合禮南城侯之婦封其舊功况夫人慎徽四德四德咸舉經綸二儀二儀克從匱武收繼趙之勳產姚承配夏之慶吹凱風於椒掖外王母於梧宮盛德大業窮光極寵啟國西鄭不亦宜乎十數年間二子榮立每至四時令節六參嘉會魚軒照門龜艾交室爲壽則珠貝山積侑幣則錦綺霞舒白玉滿堂聚姻親而同有黃金作穴散鄰里而無餘君子欽其市義聖人嘉其寶儉故寢疾則飲食天廚湯藥御府匪日伊夕上宮駟驛於閨庭送終則威儀傾都車騎暄日自宮徂野中使相望於道路哀榮之盛書記罕聞猗歟所謂小君之遺美聖善之高烈者也如使後代考南史議西陵披簡牘而嘆息臨山原而茫昧旌賁之道不期闕而然則外甥之碑武檐之石非明淑之壘其何所設焉辭成進御帝稱曰善顧謂尙札我其書之於是灑翰黃縑

縷字青琬雲橫波感神變艷爛於山門鶴倚鸞翔生氣宛延於松路禮尊事絕恩榮迹遠斯又元德動天幽誠廻日之奇致也往昔未覩名言莫逮銘曰

代有母德厥氏揚兮祖考爲士夫爲王兮聖后中葉愍萬方兮天命未改復歸唐兮賢淑啟祔繼絕亡兮宗周雖滅神女昌兮建號西鄕榮舊鄉兮魚軒翟茀盛寵光兮二子雙飛華綬章兮朱輪魚軒延煒煌兮去此昭昭卽茫茫兮何處詔葬少陵阜兮貴妃慈親侯王舅兮寒暑流易山川久兮古墳坡陲老樹朽兮壽宮靈域百代守兮頌石光華千載後兮

汾陽王妻霍國夫人王氏神道碑

楊綰

鵲巢配德合好之義深象服建封寵光之至極況動循法度躬事蘋蘩揭四德而表儀高門秉一心而輔佐君子則有夫人王氏有唐元輔汾陽王之伉儷本其盛族著於太原高祖長諧皇左武衛大將軍秦州都督平原郡公贈荊州大都督陪葬獻陵曾祖德元銀青光祿大夫唐州刺史祖士會河南府陸渾縣令父守一靈王府掾贈兖州大都督或勳閥可稱或理行尤異積仁儲慶奕葉聯華夫人卽兖州府君之長女敏悟生知孝慈天性誕含柔範光起韶儀親執組紉備詳圖史女宗之美燦

然有光年旣及笄禮從納幣言告師氏歸于汾陽汾陽時寵祿未崇盛業猶晦夫人循節儉之行服
澣濯之衣祇事舅姑恪恭朝夕視庖主饋未嘗假人下氣怡聲率由至性生旣竭其養歿又極乎戚
慎徽衆善敦叙大宗睦娣姒以仁接中表以義由是閨門以穆婦道有聞天寶中汾陽分鎮河東策
勳王府夫人從夫之義封琅琊縣君尋又進封太原郡君其後寇盜橫厲風雲元感汾陽乃首啟戎
行宣力王室出則統一師旅入則燮贊台階元勳旣崇殊賞斯至內訓之功也其子或位列通侯或
室嬪貴主姻連右戚榮冠中朝門通河漢之津地成冠蓋之里每令節嘉賞長筵高會青紫照庭環
珮盈室薰灼人代莫之與京然約己尙柔從夫體順服仁不倦率禮無爲總是具美允膺多福亦嘗
排鳳闕謁龍顏及承制曰汾陽王妻太原郡君王氏婉婉淑德齋莊令容稟訓姆師友于琴瑟作賓
君子宜爾室家克著艱難之勳實由輔助之力可封霍國夫人初汾陽受命東征長驅河朔夫人處
於西土三徙其居導諸子以義方規衆女於典則用能聿尊禮度叨加等之顧問奉殊常之寵錫容
止合度威儀可觀帝嘉其賢尤所稱重宜其阜昌盛業蕃衍華緒荷恩渥於上天保榮耀於當代而
夫人蘊高世之度抱出塵之節以爲致盈必損理有固然誓棄浮華願歸正覺於是損其服玩斥其